

# PIRIPOSI

## Paoro Iokanatsopatakiti Piriposi Auakanimoni

---

**1** <sup>1</sup>Nota Paoro, Tximótxio pakini, Kristo Xesosi nitiriakori iua amotakini atxaua. Niökatsopata ikini kãkiti Kristo Xesosi nakitiakorimoni, Piriposi sitatxiti auakanimoni aiokanapireta. Niökatsopata hïte kötãkikarerinimoni, kotxi hïte ôtãkikana Xesosi sãkire auiãkani. Hïtepekana, kamiparïkarerini, niökatsopata hïtemoni, kotxi hïte moianatana Xesosi sãkire auiãkani.

<sup>2</sup>Ereëkai hïte. Aïri Teoso, Xesosi Kristo Apiananiri pakini sikai ikinipoko erekari. Ninoa kamaerekaxiniretai.

### Paoro Misãkiretari Teoso Piriposi Auakani Ìkapani

<sup>3</sup>Hïte nixinikasaaki: “Erekapitikari aTeosone,” nitxa. <sup>4</sup>Teoso nimisãkiretakasaaki hïte himakinika ìkapani, nipoxokoniritika nimisãkiretari Teoso. <sup>5</sup>Nipoxokoniuata, kotxi hïte miparïkatano nota Teoso iokanapirena erekari nisãpiretini ìkapani, kotxi hïte iokanataro txineiro notamoni. Teoso iokanapirena erekari hãuikasaaki, hïpotorika himiparïkatinino. Eereka kona hïte iotokaika himiparïkatinino nota. Uatxa auapika himiparïkatinino nota. <sup>6</sup>Teoso sikari erekari hïtemoni merepanika isãkire hãuikasaaki, ininiã nota imarotapitikari Teoso sikari erekari hïtemoni ikiniõtika. Ikara Teoso parïka hïtemoni. Erekarì isikiniritika Xesosi kanapiriã ìkorapokoriti. <sup>7</sup>Atãopitika nixinikini hïte nipoxokoniritika, kotxi iteene nitiretai hïte himakinika. Atxiïti kateia ãki naua. Atxiïti mapara naua, kãkiti Teoso iokanapirena erekari atão ininiua noerekini ìkapani. Atxiïti nisãpiretari Teoso iokanapirena

erekari, kākiti iteene imarotiniri ĩkapani. Kateia āki nauakasaaki, mapara nauakasaaki, ĩkiniōtika hĩte notakata apakapari ĩkinipoko erekari Teoso sikakiti. <sup>8</sup>Nota iteene tĩretai hĩte. Kristo Xesosi tĩretĩnĩi atokokana nitĩretai hĩte. Teoso imarotari ĩkara nisākire atāo ĩnĩni.

<sup>9</sup>Nota misākĩretari Teoso hĩte ĩkapani ia atoko: Ninĩrekari hĩtĩraōkiuatĩni apiaāpotĩni ĩkiniōtika. Hĩtĩraōki aneeāpotakasaaki, ninĩrekari himarore apaka aneeāpotĩni. Imaroretxi himarōāpotakasaaki, ninĩrekari atāonoka himarotĩni. <sup>10</sup>Ikara atoko ĩnĩnĩā, ĩmĩereēri apia erekari hĩkamĩni. ĩnĩnĩā maĩrekati !hĩkama. Maĩrekati na apanakinĩmoni !hĩkama. ĩkara atoko ĩnĩnĩā, ĩposopeka hĩtxa Kristo kanapĩriākasaaki. <sup>11</sup>Ikara atoko ĩnĩnĩā, ĩkinipoko hĩkamakĩti erekari. Xesosi Kristonokara kamaĩrekatai hĩte hĩkamakĩti ĩreka ĩnĩni ĩkapani. Apanakinĩ atamatakasaakĩri erekari hĩkamakĩti, nĩnoa imarotari Teoso posotiĩre, ĩnĩnĩā eereka nĩnoa: “Peerekari Teoso,” ĩtxanako.

### Paoro Misĩritiko Pĩrena

<sup>12</sup>Nĩtariakori, ĩmarotari nota iteene misĩritaāka. Iuaritika Teoso ĩokanapĩrena erekari ĩarĩpĩretapeka. Ninĩrekari ĩmarotĩnĩri, nĩmisĩritiko xĩka apĩkomoni kākĩti imarotari Teoso ĩokanapĩrena erekari. <sup>13</sup>ĩnĩnĩā nĩmisĩritiko xĩka ĩkinĩka sotatoakori, Homanoakori auĩte aapoko ĩnĩkatakani, ĩkinĩmane kākĩti mapara auakani apaka imarotari nota uai kateia āki nauakasaaki Kristo sākĩre nisāpĩretĩni xĩka. <sup>14</sup>Itori aĩtariakori Apĩananĩri sākĩre auĩākani, sĩkataparaxĩnĩretaāka, kotxi ĩmarotarĩna Teoso nĩkatĩnĩno nota kateia āki nauakasaaki. ĩnĩnĩā nĩnoa sāpĩretari Teoso sākĩre ĩtaparaxĩnĩrerĩtikana. Mapĩkaretĩka ĩtxana.

<sup>15</sup>Nĩnoa sāpĩretari Kristo sākĩre, kotxi ĩnĩrekarĩna erekari ĩkaminĩna. Txamari apanakinĩpekana sāpĩretari Kristo sākĩre nota xĩkotĩko xĩka. ĩnĩrekarĩna kākĩti auĩkĩnĩri nĩnoaka sākĩre, nota sākĩre poĩāoka auĩkĩnĩna ĩkapani. Nĩnoa sāpĩretari Kristo ĩokanapĩrena, kotxi nĩnoa potxĩtari kākĩti taparakĩenatakakĩnĩua. <sup>16</sup>Aĩtariakori, ĩrekarĩnĩni nĩrekakani, sāpĩretari Kristo ĩokanapĩrena, kotxi nĩnoa tĩretano nota. Nĩnoa imarotari Teoso sĩkĩnĩno nota ia parĩkatxi, Teoso ĩokanapĩrena erekari atāo ĩnĩni noĩrekĩnĩ ĩkapani. <sup>17</sup>Nota xĩkotakani sāpĩretari Kristo sākĩre, txamari ĩnĩrekarĩna nĩnoaka nĩreēkĩti ĩkaminĩna. !ĩnĩrekarĩna Teoso nĩreēkĩti. ĩnĩrekarĩna nota apia atatsĩtĩnĩri nĩmisĩritiko uai kateia āki nauakasaaki.

<sup>18</sup>Atxiiti Kristo iokanapirena sãpiretakani ãkixinire erekari. Atxiiti ninoa ãkixinire kona erekari. Iuaritika erekapitikari, kotxi Kristo iokanapirena sãpiretapeẽkaika. Ininiãkara nipoxokoniuaata nota. Ari, Iniotokapani nipoxokoniuatini. <sup>19</sup>Nipoxokoniuaata, kotxi nimarotari nitakanapiniri kateia, kotxi hĩte misãkiretari Teoso nota ĩkapani. Nimakatzakaãkako kateia ãki, kotxi Erekari Matamatakoti Xesosi Kristokata auakari moianatano nota. <sup>20</sup>Kona ninirekari nipẽtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini ĩkapani. Ikara atoko nininiã, apanakini imarotari Kristo Apiananiri ininiua. Ikiniõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nipĩkasaaki apaka, ninirekari apanakini imarotiniri Kristo Apiananiri ininiua. <sup>21</sup>Auapanika ninakasaaki, ninirekari Kristo nireẽkitinoka nikamini. Erekapitikari nipinini, kotxi eereka Kristokata nauapika. <sup>22</sup>Auapanika ninakasaaki, nipaĩkauatapitipo Teoso sãkire nisãpiretini, ininiãkara erekari nipaĩka. Kipa ninireka? Nota auapanika nininikani? Nipininikani? !Nimarotari ninireẽkiti. <sup>23</sup>Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĩkapani. Ikara atoko apiaerekata. <sup>24</sup>Txamari hĩte noerekini ĩkapani, ninirekari auapanika ninini, kotxi hĩte nirekapanikano nota. <sup>25</sup>Ikara nimarotapitika, ininiã auapanika nitxa, himakinika noerekini ĩkapani, kotxi nota nirekari himarõãpotiniri Teoso sãkire. Ninirekari hãuikiniri hĩpoxokoniritika. <sup>26</sup>Ininiã eereka hĩtxari: “Erekapitikari Kristo Xesosi, kotxi Paoro iuaĩkana apoka atemoni,” hĩtxapaniko. Ininiã iteene hĩpoxokoniuaata iusaaki.

<sup>27</sup>Atxiiti auapanika nitxa, atxiiti nipina, iuaritika ikiniõtika ereka hĩtxako hãuini. Erekari Kristo iokanapirena, ininiã hĩte apaka ereka hĩtxako hãuini. Atxiiti nisa hĩtemoni. Atxiiti kona nisa. Atxiiti nikenakopiretai hĩte uai kateia ãki nauakasaaki. Iuaritika, hãuini ereka inakasaaki, nimarotariko hĩte himakinika iteene auikiniri Kristo sãkire iua iokanapirena erekari. Hãuini ereka inakasaaki, nimarotari hĩte himakinika sãpiretiniri Kristo iokanapirena iaõka apanakinimoni. <sup>28</sup>Hãuini ereka inakasaaki, na hĩpĩkana hĩte omanatakani. Hĩtaparaxiniriritika hãuiniã, ninoa hĩte omanatakani imarotari ixipokinina ãti õti. Hĩtaparaxiniriritika hãuiniã, ninoa imarotari Teoso makatzakinii hĩte himapinakani ĩkapani. <sup>29</sup>Ininiã Teoso sikari erekari hĩtemoni, kotxi iua auiritai hĩte auikiniri Kristo iokanapirena. Apaka erekari isikai hĩte, kotxi iua auiritai hĩte

atatsiitiniri himisiritiko Kristo ĩkapani. <sup>30</sup>Hĩte atamatapekari nota misiritiko, hĩte sauaki nauakasaaki. Hĩkenakopiretari nimisiritiko auapanika uatxa. Uatxa hĩte nota atoko, kotxi hĩte apaka misiritaāka.

### Kristoka Poiāotakaua.

**2** <sup>1</sup>Kristo sikataparaxiniretaua ate, iua nakiti aniniāua. Kristo mĩkapiritaua ate, amarini axapitiri inoro mĩkapiritini atoko itxa, kotxi iua tiretaua. Ātipirika iua Erekari Matamatakoti amoiانari itxaua. Kristo iteene tiretaua. Iua amonĩkaua. <sup>2</sup>Ininiākara nota ōtākikai hĩte hĩkinika. Hĩxinikariko Teoso nireēkitinoka hĩkamini, ininiā hĩxinikakiti ātinoka txauako. Hĩtiretakakauako Teoso tiretiniua atokokana. Hinireēkiti ātinoka txauako. Ikara atoko hininiā, iteene hĩkamapoxokonitano nota. <sup>3</sup>Kona kapotxinaniri hĩtxapeua. !Hĩuikapeua. Hĩteka minakati hĩtxauako. Hĩxinikariko: “Apanakini apiata, nota poiāoka”. <sup>4</sup>!Hĩxinikapiri pite nireēkitinani. Himiparĩkatanako apanakini, ninoa nireēkiti ikaminina ĩkapani.

<sup>5</sup>Xesosi Kristo xiniākitikanerako hĩxinikako. Kristo kamakitikanerako hĩkamako. <sup>6</sup>Teoso itxaua Kristo Xesosi, ininiā iposotari ipaniātiniri ikinimane inireēkiti ikaminina. <sup>7</sup>Iuaritika itakanapari auĩtetxi ininiua. Nitiritxi atoko itxapekaua. Iuaka minakati itxĩkitakaua, kotxi kãkitipeka itxaua uai itixi iponaniākasaaki. <sup>8</sup>Iuasaaki kiki inakasaakiua, iuaĩkana iuaka ipoiāotakaua, kotxi ikĩpitari Teoso sãkire ipinini ĩkapani. Imarotari okiko tĩkane, kokaniri okiko atoko inaākako aamina ĩpiriāmitakari nopini. Iuaritika ikĩpitari Teoso sãkire ipinini ĩkapani. <sup>9</sup>Ikara atoko ininiā, Teoso txĩkitakari iua Apiananiri ininiāua. Āti iua atoko inakari !auari. Teoso takari iuāka. Āti uāka iua atoko inakari !auari, <sup>10</sup>kotxi kãkiti ikininape kenakotakasaakiri iuāka Xesosi, ikapotreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipĩkani auiniātaā pakini kapotreēkauako Xesosi apisatoō, kotxi iauĩtena itxaua Xesosi. <sup>11</sup>Ikinipoko kãkiti txako: “Xesosi Kristo Apiananiri itxaua,” itxanako. Ikara atoko ininiā ikinimane: “Peerekari aĩri Teoso,” itxanako.

### Iōriki Atoko Hĩtxako

<sup>12</sup>Ininiā nota tiretakini, hĩkĩpitariko nisãkire uatxa, mitxi hĩtekata nauakasaaki nisãkire hĩkĩpitini atokokana hĩtxako. Uatxa kona hĩtekataikano, iuaritika ninirekari apiata hĩkĩpitiniri

nisākire. Teoso makatxakapekari himaerekani itixine hīsini ĩkapani, ininiākara ikiniōtika hīparīkauatako Teoso ĩkapani. Hīpīkariko maerekati hīkamini. Erekarinanira hīkamapikako. <sup>13</sup>Hīposotari ikara atoko hīkamini, kotxi Teosokara moianatai hīte. Iua kamanirekaretai hīte iua nireēkiti hinirekini ĩkapani. Iua sikaposotiiretai hīte iua nireēkiti hīkamini ĩkapani.

<sup>14</sup>Hīparīkauatakasaaki, !hītsoatape, !hītxitakakapeua. <sup>15</sup>Ikara atoko hīkaminiā, hīkerokiniri !auari, himaerekani !auari, ininiā erekarinoka hīkama apanakinimoni. Ininiā Teoso anaakori erekarini hīttxaua. Kākiti kamisirienererini sauaki hāuanāta hīte. Kākiti maerekani sauaki hāuanāta. Iōriki iopinikari iaxiti ĩkanōka. Iōriki atoko hīttxako. Hīopinikariko maerekati auiniātaā, atāo inakari kākiti imarotini ĩkapani. <sup>16</sup>Hīte iopinikari ipiā, Teoso sākire apanakinimoni hīsāpiretakasaaki. Teoso sākire txīkitakari kākiti ātipirika auāki inini tīkane, Teosokata auini ĩkapani. Hīte Teoso anaakori erekarini hininiāua, nota iuikaiko hīte, Kristo uaimoni kanapiriākasaaki, kotxi hīte auikapekari Teoso sākire nisāpiretakiti. Kona maxikatīlkani nīparīkauatapitipo hīte ĩkapani, kotxi hīte auikapekari Teoso sākire nisāpiretakiti.

<sup>17</sup>Atxiīti nota okaāka Teoso sākire nisāpiretini xika. Atxiīti niarēka oxikepoakataāka, Teosomoni sikakori atoko inakari, Teoso sākire nisāpiretinii xika, Teoso sākire hāuikini xika. Nokaāka atxiīti, iuaritika nīpoxokoniua. Nīpoxokoniua hītekata. <sup>18</sup>Ininiā erekari hīte apaka poxokoniuatini. Erekarini hīpoxokoniuatini notakata.

### Tximótxio Pirena

<sup>19</sup>Xesosi Apiananiri nirekiniāri nota iokanatiniri Tximótxio hītemoni, ininiā mapaōtipeka inakasaaki niokanatarini iua. Ininiā eereka iua minapiretari hīte pirena, nota apaka poxokoniuatini ĩkapani. <sup>20</sup>Āti Tximótxio atoko inakari uai !auari, kotxi iua iteene tīretai hīte. Iua nirekari hāuini ereka inini. <sup>21</sup>Apanakini kākiti xinikari ninoaka nireēkitinoka. !Ixinikarina Xesosi Kristo nireēkiti. <sup>22</sup>Himarotari iua Tximótxio parīkauatape notakata, imi irikata parīkauatakari atoko itxa. Iparīkauata notakata Teoso iokanapirena erekari apanakini asāpiretini ĩkapani. Ininiākara himarotari Tximótxio atamakaākapeka, ininiā himarotari erekapitikari iua. <sup>23</sup>Kiatokopa ninataāka? Uatxa !nimarotari. Nimarotakasaakiri, niokanatarini Tximótxio hītemoni. <sup>24</sup>Apiananiri kamaimaroretano nota, Tximótxio tīkinimoni nota apaka apoka ereē hītemoni.

### Eparotxito Pirena

25 Notamoni erekari iuaĩkana niokanatiniri hĩokanapirena mĩkari, Eparotxito inakori. Hĩte iokanatapekari iua notamoni nota itiretini ĩkapani. Iua nitari atoko itxa. Imiparĩkatapitipono nota, Teoso iokanapirena asãpiretakasaaki. Iua, nota pakini sotato atoko atxaua, kotxi ate neenamauata Teoso ĩkapani. 26 Iua ipiãtai hĩte hĩkinika. Iua maerekaxiniretinoka itxa, kotxi ikenakopiretari hĩte imaropiretiniri iua amianatini. 27 Atãopitikara iua amianatapitika. Iua ipinaarita, iuaritika Teoso amonĩkari iua. Itxĩkitakari iua iuaĩkana ereka inini. Ininiã Teoso amonĩkano nota apaka, kotxi Eparotxito ipinaãkamako, apia maerekaxiniretinoka nitxamako. 28 Ininiãkara iteene ninirekari niokanatiniri iua hĩtemoni, hĩpoxokoniuatini ĩkapani haõkitakasaakiri. Ikara atoko ininiã, nota maerekaxiniretinoka ninini !uaaika. 29 Ininiã hĩpoxokoniritika hãpakapariko iua, kotxi iua Eparotxito aĩtari itxaua, kotxi Apiananiri nakitiakori atxaua. Hĩpaxitariko kãkiti Eparotxito atoko inakari, 30 kotxi Kristo ĩkapani iparĩkauatini xika ipinaarita. Iuaka monõkorimoni isa nota imoianatini ĩkapani, kotxi iua imarotari hĩte nirekapitikamari himoianatinino, txamari !hĩposota himoianatinino, ininiã iua iteene moianatano.

### Kiatokopa Kãkiti Atão Ereka Inini?

**3** 1 Nitariakori, apikomoni nisãpiretai. Hĩpoxokoniuatako, kotxi Apiananiri nakitiakori atxaua. !Nisãpaka iuaĩkana nisãpiretakitipeka nisãpiretinii hĩte. Iuaĩkana nõtãkikai hĩte, atão minakati himauikakani ĩkapani. 2 Erepaniko kãkiti maerekati kamakani, atão minakati sãpiretakani, kotxi ninoa sãpiretari kãkiti: “Teoso takaõtxikare piĩtoã mauakaniã, kona Teoso nakiti !pitxaua,” itxana. 3 Ninoa auapitika Teoso takaõtxikare iĩtoãna, txamari kona Teoso nakitiakori !itxauana. Atera Teoso nakitiakori, kotxi atemoni aua atão inakari Teoso takaõtxikare ate ãkixinireẽ, kotxi Erekar Matamatakoti oerekaua amisãkiretiniri Teoso. Kristo Xesosinokara ate iuika. Aimarotari ateka kamakiti !itxa. Teoso kamakitinokara apakata. 4 Hĩuãkatari atxĩiti hĩte kamakiti ereka inini Teoso apakapinii ĩkapani? Konapitini. Nota kamakiti apiaerekata, iuaritika nikamakiti !txĩkitakano Teoso apakapinino ĩkapani. Hĩkenakotariko erekari nota kamakiti: 5 Teoso takaõtxikare niĩtoã takaãka oito õti nauakasaaki. Nirini, ninoroni pakini Xoteo itxauana. Natokiri kitxakapirĩka

Pëxamiĩ inakori. Kitxakapirĩka natokiriakorini, nakiroakoroni pakini ikinika Xoteoakori itxauana, ininiã atão Xoteo nitxaua. Nota kĩpitari aãuĩteakori kitxakapirĩkarini paniãtakiti, kotxi nota pariseo nitxaua, ininiã Teoso sãkire iõkatsopatakori oerekakari nitxaua. <sup>6</sup>Nota iteene nirekari Teoso nireẽkiti nikamini, ininiã nimisiritari kãkiti Xesosi sãkire auiãkani, kotxi niuãkatari Teoso nirekari ikara nikamini. Aãtokiriakorini paniãtakiti ikinika nikĩpita. !Nikerokari.

<sup>7</sup>Mitxi niuãkatari ikara atoko nininiã erekapitikari, ininiã, “Teoso apakapapitikano nota,” nitxa. Uatxa nimarotari Kristo, ininiã nimarotari mitxipe minakati nininiua nota. <sup>8</sup>Uatxa nimarotari niauĩte Kristo Xesosi. Ikara apiaerekata. Xesosi nimarotini apisapanika, nikamakiti !itxa xatiki. Nitakanapapekari mitxi nikamakiti. !Itxaika. Mitxi nikamakiti itiki atoko, kotxi !ninarekaikari. Kristo nakiti uatxa nitxaua. <sup>9</sup>Nitakanapapekari mitxi nikamakiti Kristokata ãtipirika nauini ĩkapani. Nota kĩpitari Moisesini paniãtakiti. Ikara atoko inakarinani kona ereka txĩkitakano nota. Teosonokara kamaerekatano nota, kotxi nauikari Kristo sãkire. <sup>10</sup>Ninarekari Kristo iteene nimarotini. Ninirekari nimarotiniri Teoso posotiire, kotxi iposotiireẽ õkitikari Kristo, iuaĩkana auãki inini ĩkapani. Kristo atatsiirauatape, ininiã nota apaka nirekari natatsiirauatini atão imoianari nininiua ĩkapani. Ninirekari nota nireẽkiti ipinini, Kristo aamina ĩpiriãmitakari nopini ipinini atoko. Ninirekari Xesosi nireẽkitinoka nikamini, ininiã iua atoko nitxaua. <sup>11</sup>Ininiã itixi xipokini õti Teoso õkitikanoko, iuaĩkana auãki ninini tĩkane.

### Mitekakari Atoko Nitxa

<sup>12</sup>Ikara ikinika !nimarotapanika. Nimaroãpotapanikariko. Teoso kamapanikari iparĩka nota ãkixinireẽ. !Xipokapanikari, ininiã !niotokakari niparĩka Teoso ĩkapani. Niparĩkauatapitipo. Mitekakari mitekini atoko, !niotoka. Mitekakari nirekari mitekaxi mapotõkire apokini. Iua atokokana nota nirekari niparĩka mapotõkire napokini, kotxi Kristo Xesosi mereẽno nota ikara atoko nikamini ĩkapani. <sup>13</sup>Nitariakori, niparĩka mapotõkire !napokapanika. Ia nikamako: !Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, niparĩka mapotõkire napokini ĩkapani. <sup>14</sup>Mitekakari iteene nirekari mitekaxi mapotõkire apokini imitekini ĩki apakapini ĩkapani, ininiã imitekapitipo. !Iotoka. Iua atokokana nota parĩkauatapitipo Teoso ĩkapani, niparĩka

mapotōkire napokini ĩkapani, niparĩka ĩki Teoso sikakiti napakapini ĩkapani, kotxi Teoso pĩkapiretano nota Kristo Xesosiã itixine nisini ĩkapani, niparĩka ĩki napakapini ĩkapani.

<sup>15</sup>Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hĩte atão inakari. <sup>16</sup>Mitekaxi kamakari paniãtakiti iaōka mitekakari kama imitekasaaki. Iua atokokana makamariko Teoso paniãtakiti. Uatxaika akamakiti atokokana makama.

<sup>17</sup>Nitariakori, hĩkamariko nota kamakiti atoko inakari, kotxi ate oerekapekai hĩte ikara atoko inakari hĩkamini. Hĩkĩpitariko nota kamakiti atoko inakari kamakani sãkire. <sup>18</sup>Kaiãopokori kãkiti !auikari Kristo ipinini amaerekani imaktxakini ĩkapani. Kristo omanatakani itxauana ninoa. Itokatapeka ikara nisãpiretai hĩte, ininiã iuaĩkana uatxa ikara nisãpiretai. Iteene nimatinaniuata ninoa xika. <sup>19</sup>Itixi mapotōkire õtisaaki ninoa iokanataãkako maerekani misiritikoãtaã. Iĩtona iteasonena atoko itxana, kotxi iĩtona nireẽkitinoka ikamana. Ikamakitina !erekari, iuaritika iuikarina ikamakitina. !Ipẽtauatana. Ninoa xinikapikari ĩkorapokoriti. !Ixinikarina Teoso. <sup>20</sup>Atepekana, Teoso tixine auakani atxapekaua. Aiãtapari apoxokoniritika kãkiti maerekani maktxakakari iuaxitikiri uaimoni apokini. Iua Xesosi Kristo Apiananiri itxaua. <sup>21</sup>Iuasaakiko inoãkari aĩto mataparati. Itxĩkitakari aĩto iua ĩto erekari atoko inini. Iposotari, kotxi kaposotiirer itxaua iua. Ikinimane kamapitikariko ipaniãtakiti, kotxi kataparari iua Xesosi.

### Õtãkipirenatxi

**4** <sup>1</sup>Nitariakori, nota iteene tiretai hĩte. Nipiãtai hĩte. Hĩkamapoxokonitano nota. Niuikai hĩte, kotxi niparĩka ĩki atoko hĩtxa. Nitiretakini, hĩxinikariko ikara nota õtãkikinii uatxa. Nota õtãkikinii hĩkĩpitiniã, !hĩtakanapari Apiananiri.

<sup>2</sup>Nota õtãkikai hĩte Epótxia inakoro, Sĩtxiki inakoro pakini. Hĩkĩpitariko Apiananiri sãkire. Hĩotokakariko hĩtxitakakiniua.

<sup>3</sup>Pitepekana nimoianari erekari, nota nirekai pite õtãkikinina naia sito ipi, kotxi ninoa parĩkauatapeka notakata Teoso iokanapirena erekari asãpiretakasaaki. Ninoa parĩkauata notakata, Kremẽtxi inakori pakinikata, apanakini nimoianariakorikata apaka. Ninoa uãka Teoso aãtsopeãẽ iõkatapeẽkaika, Teosokata auapininiika ininina tũkane.

<sup>4</sup>Hienenĩkapikako, kotxi Apiananiri nakiti hĩtxaua. Iuaĩkana nitxai. Hienenĩkako.



<sup>5</sup>Erekari hīkamako apanakinimoni. !Hītxitapena. Erekari apanakini imarotiniri hīte ereka hinini. Apiananiri kaiamapeka ikanapiriini uaimoni. <sup>6</sup>Na xatiki maerekaxiniretika !hīttxape. Maerekaxinireti hinakasaaki, himisākiretariko Teoso. Hamanaāri hinireēkiti. Himisākiretakasaakiri Teoso, hīttxariko: “Erekapitikari notamoni pikamakiti,” hīttxariko. <sup>7</sup>Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, iuaritika peerekari. Hākixinire erekaxinirepeka ininiā, maerekati !īroā hākixinireē. !Hinirekaikari maerekati hīxinikini. !Hinirekaikari maerekati, kotxi Kristo Xesosi nakiti hīttxapekaua.

<sup>8</sup>Nitariakori, nisāpiretakiti xipokini apisa, nisāpiretapanikaiko hīte. Hīxinikariko atāo inakari sākiretxiti. Hīxinikariko atāo inakari hīsāpiretini. Hīxinikariko atāo inakari hīkamini. Hīxinikariko erekarinoka. Hīxinikariko tiraōkitxi. Hīxinikariko potxitakori. Ikara atoko inakarinoka hīxinikako, kotxi erekapitikari ikara. Peerekari ikara. <sup>9</sup>Hīkamapikariko noerekakiti iaōka. Hīsāpiretanako apanakini hītemoni nisāpiretakiti. Hīkamariko nota kamakiti hītiākiti atokokana. Ininiā Teoso kākiti kamaerekaxiniretakari kaikota hītekata.

### Paoro Potxitari Ninoa Sikakiti

<sup>10</sup>Apiananiri nakiti nitxaua, ininiā iteene nipoxokoniua. Iuaīkana hīte oerekari hītiretinino, txineiro hīsikakito hīokanatinano, ininiā nipoxokoniua. Ātipirika hīxinikano, kotxi iteene hītiretano. Txamari mitxi !hīposotari hīsikakiti hīokanatinini notamoni. <sup>11</sup>!Namanaāi iuaīkana txineiro hīokanatinini notamoni. Ikinipoko ninireēkiti auakasaaki, nipoxokoniua. Ikinipoko ninireēkiti mauakanisaaki, iuaritika nipoxokoniua. <sup>12</sup>Nota napapekari nimamākani, nimanipokoreni, nimatxineiroteni pakini. Apaka nimarotari ātikataā ninireēkiti ikinipoko auinano. Teoso oerekapekano ikiniōtika nipoxokoniuatini. Nienenīka nipokori auakasaaki. Nienenīka ninatxitakasaaki apaka. Nienenīka ikini sereti auinakasaakino. Nienenīka minakati mauinakanisaakino. <sup>13</sup>Ikinipoko niposota nikamini, kotxi Kristo sikano iposotiire.

<sup>14</sup>Erekapitikai hīte, kotxi nimatxineirotenisaaki, hīokanatarini txineiro notamoni. <sup>15</sup>Teoso iokanapirena erekari merepitipanika hīkenakotakasaaki, ereē Masetónia tixini nosipikasaaki, hīte Piriposi auakaninokara iokanataro txineiro napakapini īkapani. Apanakini Xesosi sākire

auiãkani ãtiãtaã auakani, liokanatinano nota. Himarotapekari ikara. <sup>16</sup>Tesarónika sitatxiti nauakasaaki, ninirekakiti auakasaaki, itokata txineiro hïokanatinano. <sup>17</sup>Niãtaparo txineiro hïsikininino. Niãtapari Teoso sikinii erekari, kotxi hïte tirtapekano nota. <sup>18</sup>Napakapapekari ikinipoko hïokanatakiti. Kaiãopokori hïokanatakiti. Epararotxito inakori mininano hïsikakiti, ininiã ikinika ninireëkiti uatxa auinano nota. Teosomoni sikakori kamariri atoko itxa hïte sikakiti notamoni. Teoso potxitari hïsikakiti notamoni. <sup>19</sup>NiTeosone sikaiko hïte hinireëkiti ikini sereti, kotxi ikinipoko aua iuamoni. Isikaua, kotxi Kristo Xesosi nakitiakori atxaua. <sup>20</sup>ãtipirika matxari Teoso: “Peerekai aïri, aTeosone. Ameë.”

### Takanapapirenatxi

<sup>21</sup>Hïãpiretanako ikinimane ereë auakani Kristo Xesosi nakitiakori, nixinikamanapitinina ninoa. Aïtariakori uai notakata auakani xinikamanapitai hïte apaka. <sup>22</sup>Ikinimane uai auakani Teoso nakitiakori iokanapireta hïtemoni ixinikiniina. Homanoakori auïte aapoko auakani, Teoso nakitiakori, iokanapireta hïtemoni iteene ixinikiniina.

<sup>23</sup>Xesosi Kristo Apiananiri sikari ikinipoko erekari hïtemoni. Ameë.